

Berita-berita Ringkas Dari Alam Islam

Dari Amman diberitakan bahawa

al-Sayyid Abdelmunim al-Rifai – Menteri negara Jordan bagi urusan luar negeri – telah berangkat ke kota “Strasbourg” sebagai mewakili negara-negara Arab di dalam suatu persidangan “Majlis Eropah”. Persidangan Majlis Eropah itu dianggotai oleh perdana-perdana menteri dari 18 buah negara-negara Eropah dan lembaga-lembaga politik yang di bawah tawanan parlimen negara-negara tersebut.

Di dalam perjalannya ke kota “Strasbourg” beliau akan singgah di Paris untuk mengadakan rundingan ringkas dengan pembesar-pembesar negara Perancis. Di dalam Persidangan Majlis Eropah kelak beliau akan membentangkan kesulitan-kesulitan yang sedang dihadapi oleh negara-negara Arab di Timur Tengah.

* * *

Al-Sayyid Lutfi Acduhame – Naib President Turki, yang pada masa ini sedang mengunjungi sebahagian daripada negara-negara Arab – menegaskan bahawa negerinya tetap menyokong negara-negara Arab di dalam perjuangannya menghadapi ancaman Zionis Yahudi katanya: “Turki akan memutuskan perhubungan diplomatik dan ekonomi dengan negara Israel jika sekiranya negara itu tetap berdegil tidak mahu mematuhi perintah Bangsa-bangsa

Bersatu untuk menggundurkan tentera-tenteranya dari bumi Arab yang telah didudukinya di dalam perperangan bulan Jun 1967 yang lalu.

Di samping itu al-Sayyid Lutfi Acduhame menyeru negara-negara Arab supaya bersatu padu di dalam semua lapangan untuk membasmi kesan-kesan permusuhan Yahudi dan seterusnya mengusir mereka daripada bumi Arab.

Seterusnya beliau berkata: “Soal Palestin hanya dapat diselesaikan dengan dua jalan sahaja, tidak ada jalan yang ketiga. Pertama dengan jalan berunding (damai) dan kedua dengan jalan kekerasan tentera (perang)”.

* * *

Al-Shaykh Hussein bin Abdullah Ali

Al-Sheikh – Menteri Pelajaran bagi kerajaan Sa‘udiyyah ‘Arabiyyah telah mengeluarkan perintah kepada semua bahagian pejabat kementeriannya supaya menulis pada permulaan surat yang keluar kalimah “*Al-salāmu ‘alaykum wa rāḥmatu Allāhi wa barakātuh*” ganti daripada kalimah “Selepas salam hormat” yang biasa digunakan sebelumnya. Perintah ini dikeluarkan berdasarkan bagi memperkuatkannya “semangat Islam” di antara pegawai-pegawai yang berkhidmat di dalam pejabat-pejabat kerajaan.

* * *

Pejabat Kedutaan Indonesia di Baghdad

(Iraq) menyatakan bahawa pemerintah Indonesia dan seluruh rakyat Indonesia tetap selamanya berdiri di samping rakyat Arab di dalam perjuangannya menentang pencerobohan Israel. Kenyataan ini dikeluarkan ialah sebagai menentang perang urat saraf yang dilancarkan oleh Israel dan komplotnya bagi meretakan perhubungan persaudaraan Islam di antara rakyat Indonesia dengan rakyat Arab.

* * *

Suatu persidangan bagi memperteguhkan semangat perjuangan gorila¹ di daerah-daerah yang telah dikuasai oleh Israel telah diadakan oleh “Pasukan Sukarelawan Palestin” selama tiga hari di kota Kaherah pada bulan yang lalu. Di antara keputusan yang telah diambil di dalam persidangan tersebut ialah mencetuskan suatu tekad perjuangan yang bertema: “Kami tidak percaya perjuangan rakyat Palestin dapat diselesaikan dengan secara politik (perundingan), tetapi kami percaya perjuangan itu akan dapat diselesaikan dengan kekuatan senjata.”

* * *

Al-Shaykh Sabah Al-Salim Al-Sabah *Amīr* al-Kuwait di dalam suatu perjumpaan dengan wakil berita Kaot

¹ Perkataan sebenar ialah gerila.

Berita-berita Islam.

Iraq telah menegaskan bahawa dengan kehendak Allah perjuangan umat Arab akan mencapai kemenangan dalam masa yang tidak berapa lama lagi. Ini melihat kepada persatuan dan kerjasama di antara pemimpin-pemimpin Arab semakin bertambah teguh dah rapat. Di dalam pertemuan itu Duli Yang Maha Mulia telah menegaskan juga bahawa perhubungan di antara Iraq dengan negara Kuwait di dalam semua bidang adalah sangat kukuh. Di akhir pertemuan itu baginda membayangkan ada kemungkinan baginda mewantarkan Iraq dalam masa yang tidak berapa lama lagi.

* * *

Satu berita dari Associate

Press – di London menyatakan satu perbahasan untuk memulihkan perhubungan diplomatik di antara Britain dengan Aljazair sedang berjalan dengan rancaknya pada masa ini. Perhubungan diplomatik di antara kedua-dua buah negeri telah berputus dari sejak 2 tahun yang lalu disebabkan pergolakan siasah di Rhodesia. Walau bagaimanapun bila perbahasan itu akan selesai dan bila perhubungan di antara kedua-dua buah negeri itu akan dipulihkan belum dapat diketahui lagi.

* * *

Peguam-peguam Arab di pinggir Barat

Jordan telah menghantar suatu bantahan keras kepada pihak yang berkuasa Israel kerana membenarkan peguam-peguam Israel campur tangan membela orang-orang salah politik yang dibicarakan di dalam

mahkamah-mahkamah Arab. Peguam-peguam Arab di dalam surat bantahannya itu menyatakan mereka akan mengambil suatu tindakan tegas jika pihak yang berkuasa Israel terus-menerus membenarkan peguam-peguam Israel campur tangan menjalankan tugas mereka di dalam mahkamah-mahkamah Arab.

* * *

Berita dari Kantara menyatakan, pertukaran orang-orang tawanan di antara tentera-tentera Mesir dengan tentera-tentera Israel telah selesai dilaksanakan di bahagian utara Suez Canal di bawah naungan Palang Merah Internasional.

* * *

Pada bulan yang lalu satu perwakilan dari negeri Somali yang diketuai oleh Menteri Pembangunan Negara Somali telah mengadakan suatu lawatan rasmi ke markas Rabita al-Alam al-Islami untuk menemui *Secretary General* al-Shaykh Muhammed Suroor al-Sabban. Ketibaan perwakilan tersebut diiringi oleh Tuan Yang Terutama Duta Besar Somali di Saudi Arabia. Setelah bertukar-tukar fikiran maka anggota-anggota perwakilan tersebut telah dibawa mengunjungi bahagian-bahagian kecergasan al-Rabita yang mana pada akhir lawatannya itu ketua perwakilan Somali itu telah memuji-muji usaha-usaha yang dijalankan oleh pihak al-Rabita demi untuk berkhidmat kepada kesulitan-kesulitan yang sedang dihadapi oleh negara-negara Islam.

* * *

Dari Amman diberitakan bahawa kerajaan Jordan telah menerima wang bantuan sebanyak 1,354,024 pound sterling daripada kerajaan al-Kuwait.

Jumlah ini adalah sebagai bayaran bulan yang keempat bagi menunaikan keputusan Jordan yang telah diambil di dalam Persidangan Kemuncak Arab pada tahun yang lalu.

* * *

Berita dari New Delhi menyatakan bahawa al-Shaykh Abdullah yang lebih terkenal dengan gelaran “Singe Kashmir” telah mengeluarkan suatu kenyataan yang berbunyi: “Sesungguhnya rakyat Kashmir tidak akan membenarkan kerajaan India dan lain kuasa luar campur tangan daripada menentukan masa depan Kashmir.” Al-Shaykh Abdullah menambah kata bahawa syarat pembebasan dirinya dengan memberi pengakuan bahawa wilayah Kashmir hendaklah bercantum dengan tanah besar India dengan syarat setelah seluruh rakyat Kashmir mengeluarkan pendapat untuk menentukan masa depan mereka, beliau menambah kata hanya rakyat Kashmir sahaja yang berkuasa menentukan nasib mereka, bukan kuasa-kuasa yang lain.

* * *

Berita dari Gaza menyatakan bahawa pihak yang berkuasa Israel di Gaza terus-menerus melakukan perbuatan-perbuatan ganas dan kejam, dengan memaksa penduduk-penduduk di kawasan itu keluar dari rumah tangga mereka dan meninggalkan kampung halaman tempat tumpah darah mereka. Dalam minggu pertama dalam bulan yang lalu 71 orang rakyat Palestin di kawasan Gaza telah ditangkap atas tuduhan menubuahkan suatu komplotan yang bertujuan untuk melakukan perbuatan-perbuatan ganas dan perang gorila².

Pada beberapa minggu sebelumnya Israel telah menangkap 44 orang di kawasan itu atas tuduhan yang sama.

² Perkataan sebenar ialah gerila.